



***Sumáriu Kazu
Tribunál Distritál Dili
Novembru 2014***

**Sumáriu prosesu julgamentu kazu iha Tribunál Distritál Dili-
Períódu Novembru 2014**

Introdusaun

Iha Novembru 2014, JSMP kontinua hala'o atividade monitorizasaun ba prosesu julgamentu kazu iha Tribunál Distritál Dili no monitoriza kazu 19 entre kazu sira ne'ebé julga durante períódu ne'e.

Kazu 19 ne'e kompostu hosi kazu krime omisídiu neglizente 2, reseptasaun agravada 1, ofensa ba integridade física simples ho natureza violénsia doméstika hamutuk 4, ofensa ba integridade física grave ho natureza violénsia doméstika 1, violasaun seksuál 1, furtu agravadu 1, pekulatu de uzu 1, ofensa ba integridade física grave 1, krime kondusaun sem karta 3, danu agravadu 1, ofensa ba integridade física simples 1, krime ameasa 1 no omisídiu agravadu 1.

Entre kazu 19 ne'e, tribunál konklui ona prosesu ba kazu 9 no kazu 10 sei iha prosesu nia laran.

Tuir mai deskripsaun sumáriu julgamentu kazu kompletu:

1. Kazu krime omisídiu neglijente - Nú. Prosesu : 573/14.TDDIL

Kompozisaun Tribunál	: Singulár
Juis	: Dra. Ana Paula Fonseca
Ministériu Públiku	: Dra. Benvinda da Rosario
Defeza	: Dr. Sebastião Amado de Almeida
Konkluzsaun	: Sei kontinua prosesu

Iha 04 Novembru 2014, Tribunál Distritál Dili julga arguidu JS ne'ebé komete krime omisídiu neglijente hasoru lezadu Adão Soares (matebian). Kazu ne'e akontese iha 19 Jullu 2008, iha Sub-distritu Atauro, Distritu Dili.

Ministériu Públiku akuza katak iha 19 Jullu 2008, tuku 18:00 lorokraik, arguidu ho kareta truk baskolante ida tula lezadu (matebian) hamutuk ho nia kolega nain haat hosi ponte kais atu ba rai ida naran Raiketan. Maibé iha dalan klaran lezadu monu sai hosi kareta laran no sofre kanek todan iha ulun. Maske lezadu konsege lori ba ospital maibé liu tiha loron ida lezadu hakotu nia iis tanba kauza hosi nia kanek.

Ministériu Públiku akuza arguidu kontra artigu 140 Kódigu Penál kona-ba omisídiu negligente.

Iha audiensia julgamentu, arguidu rejeita akuzasaun ne'e no deklarara katak iha tempu ne'ebá família ida mak aluga nia kareta hodi tula sasan ba Raiketan. Hafoin to'o iha ponte kais lezadu ho nia kolega nain haat ne'ebé ho kondisaun lanu todan hapara arguidu nia kareta no obriga sae kareta maske arguidu bandu makas ona. Tuir arguidu lezadu la'os monu maibé haksoit mesak hosi kareta laran wainhira kareta sei halai.

Testemuña MS ne'ebé hanesan ema ne'ebé mak aluga kareta refere depoimentu katak antes lezadu no nia kolega sira sae kareta, arguidu inklui nia rasik bandu ona lezadu no nia kolega sira ne'e atu sae kareta tanba hare lezadu no nia kolega sira lanu todan. Testemuña hatutan katak maske nia no arguidu bandu maibé lezadu no nia kolega sira obriga nafatin sae kareta no to'o iha dalan klaran lezadu derepentia haksoit sai hosi kareta laran.

Aleinde ne'e, testemuña MB iha nia depoimentu nia reforsa-liu depoimentu hosi testemuña MS no deklarasaun hosi arguidu.

Iha alegasaun finál, ministériu públiku husu ba tribunál atu aplika pena prizaun tinan 3 suspende ba tinan 5 tanba maske lezadu no nia kolega sira obriga sae arguidu nia kareta maibé tanba arguidu ladun kuidadu nune'e fo impaktu ba lezadu haksoit sai hosi kareta.

Entretantu, defeza la aseita ho alegasaun ministériu públiku no argumenta katak akontesimentu ne'e la'os kulpa hosi arguidu maibé lezadu rasik mak hakarak haksoit sai hosi kareta. Tanba ne'e, husu tribunál atu absolve arguidu.

Depois rona tiha alegasaun finál, tribunál marka fali prosesu julgamentu ba 11 Novembru 2014, tuku 11:00 dader ho agenda desizaun finál.

2. Kazu krime reseptasaun agravada - Nú. Prosesu : 913/14.TDDIL

Kompozisaun Tribunál	: Koletivu
Juis	: Dra. Jumiati M. Freitas, Dr. Jose M. de Araujo no Dra. Fransisca C.
Ministériu Públiku	: Dr. Vicente de Brito
Defeza	: Dr. Sergio Quintas
Konkluzau	: Absolve

Iha 05 Novembru 2014, Tribunál Distritál Dili julga arguidu SF (PNTL) ne'ebé diskunfia komete krime reseptasaun agravada hasoru AdC. Kazu ne'e akontese iha 22 Jullu 2013, iha Distritu Dili.

Ministériu Públiku akuza arguidu katak iha 22 Jullu 2013, arguidu sosa motor Honda Megapro ida ho folin US\$550,00 hosi ema ida ne'ebé apresenta aan naran AdC. Arguidu rejistu motor ne'e ho nia naran iha LLAJR Baucau. Motor refere nia nain mak AdC ne'ebé lakon iha 31 Maiu 2013, iha Palacio Governu nia oin.

Ministériu Públiku akuza arguidu kontra artigu 272 Kódigu Penál kona-ba reseptasaun agravadu.

Iha audiensia julgamentu arguidu deklara katak iha tempu ne'ebá ema ida ba iha nia nia uma no fa'an motor ba nia ho folin US\$550,00. Ema ne'e dehan ba arguidu katak nia naran AdC. Maibé antes arguidu entrega osan ba ema ne'ebé faan motor ne'e, arguidu husu tanbasa fa'an motor foun ho folin baratu. Arguidu diskunfia hela ona motor refere karik motor na'ok maibé ema ne'e hatan katak nia persiza osan atu ba Irlandia tanba ne'e la'os motor naok.

Arguidu deklara liutan katak antes nia selu motor refere, arguidu ba husu tuir informasaun klaru iha LLAJR Baucau atu hatene lolos oinsa prosesu sosa no fa'an motor. Maibé iha ikus arguidu la konsege sosa motor refere tanba depois motor na'in hatene katak arguidu ba husu tuir informasaun iha LLAJR, motor nain foti fali motor refere no hato'o ba arguidu katak nia ba lai Laivai no depois fila hosi ne'ebá mak entrega motor no foti osan maibé to'o agora nunka mosu.

Lezadu AdC deklara katak iha 31 Maiu 2013, nia motor lakon iha Palacio do Governo nia oin no nia hato'o ona keixa ba LLAJR Distritu Dili iha loron ne'ebá kedas. Lakleur iha fulan Jullu nia laran lezadu hetan informasaun hosi AL hanesan funsionáriu LLAJR Distritu Dili, katak nia motor ema rejistu iha LLAJR Baucau ho naran SF.

Testemuña AL, hanesan funsionáriu LLAJR Distritu Dili, depoimentu katak nia hetan informasaun hosi RdC, funsionáriu LLAJR Distritu Baucau katak lezadu nia motor ema rejistu iha LLAJR Baucau maibé laiha dokumentus orijinal.

Testemuña RdC depoimentu katak iha tempu ne'ebá arguidu ba duni hasoru nia hodi husu prosesu oinsa sosa motor ne'ebé dokumentus orijinal laiha. Tanba ne'e testemuña esplika ba arguidu kona-ba rekizitus sosa no fa'an motor ne'ebé laiha dokumentus orijinal mak hanesan tenke iha deklarasaun entre motor nain no ema ne'ebé sosa tenki iha konesimentu hosi testemuña na'in 4 atu evita problema iha futuru. Maibé depois liu tiha loron tolu, arguidu ba fali iha LLAJR no hato'o ba testemuña katak nia kansela atu sosa motor tanba motor nain foti fila fali nia motor no ba no to'o agora la fila.

Iha alegasaun final, ministériu públiku husu atu absolve arguidu tanba arguidu laiha intensaun atu hetan vantajen patrimonía ba nia aan ka ba ema seluk. Arguidu mós hanesan membru PNTL hatene regra nune'e iha momentu ne'ebá nia buka informasaun tuir dalan ne'ebé loos ba iha LLAJR antes atu sosa motor refere tanba nia rasik diskonfia ona katak motor refere hanesan motor na'ok.

Defeza mós konkorda ho alegasaun finál hosi ministériu públiku nian no husu ba tribunál atu absolve arguidu.

Depois rona tiha parte sira, tribunál konklui kedas prosesu kazu ne'e no absolve arguidu tanba arguidu la provadu komete krime reseptasaun agravada.

3. Kazu krime ofensa ba integridade fízika simples ho natureza violénsia doméstika - Nú. Prosesu : 687/13.TDDIL

Kompozisaun Tribunál : Singulár
Juis : Dr. Antonino Gonçalves
Ministériu Públiku : Dr. Nelson de Carvalho
Defeza : Dr. Marçal Mascarenhas
Konkluzau : Sei kontinua prosesu

Iha 05 Novembru 2014, Tribunál Distritál Dili prejide julgamentu ba kazu krime ofensa ba integridade fízika simples ne'ebé involve arguidu PM hasoru LMP nu'udar arguidu nia feen. Kazu ne'e akontese iha 13 Setembru 2013, iha Fatuhada, Distritu Dili.

Ministériu Públiku akuza katak iha 13 Setembru 2013, iha tuku 20:00 kalan, arguidu basa lezada nia hasan karuk no rezulta moras. Kazu ne'e akontese tanba lezada simu sms hosi mane seluk no la fo hatene ba arguidu nu'udar nia laen.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 2, 3 no 35 alinea (b) Lei Kontra Violénsia Doméstika.

Iha prosesu julgamentu arguidu rekoñese katak akuzasaun hosi ministériu públiku loos no deklarata katak nia arrende no promete sei la repete tan iha futuru.

Iha alegasaun finál, ministériu públiku husu ba tribunál atu aplika pena admoestasaun tanba arguidu provadu komete duni krime ne'e hasoru lezada. Aleinde ne'e, defeza mós aseita ho alegasaun finál hosi ministériu públiku.

Depois rona tiha alegasaun finál, tribunál marka fali prosesu julgamentu ho ajenda leitura sentensa ba iha 24 Novembru 2014, tuku 16:00 lorokraik.

4. Kazu krime ofensa ba integridade fízika grave ho natureza violénsia doméstika - Nú. Prosesu : 434/14.TDDIL

Kompozisaun Tribunál : Koletivu
Juis : Dr. Antonio de Carmo, Dra. Jacinta Correia no Dra. Jumiati M. Freitas
Ministériu Públiku : Dra. Ivonia Guterres
Defeza : Dra. Olga Barreiro
Konkluzau : Kondena ho pena prizaun tinan 3 suspende ba tinan 4

Iha 06 Novembru 2014, Tribunál Distritál Dili prezide julgamentu aleitura sentensa ba kazu krime ofensa ba integridade fízika grave ne'ebé involve arguidu MdR hasoru MS nu'udar nia feen. Kazu ne'e akontese iha 09 Dezembru 2013, iha Bebonuk, Distritu Dili.

Tribunál prova arguidu sona lezada nia liman ho tudik no tuda lezada ibun ho blok to'o nehan fuan haat monu no suku pontu haat. Bazeia ba provas hirak ne'e, tribunál konklui prosesu ne'e no kondena arguidu ho pena prizaun tinan 3 suspende ba tinan 4.

Antes ne'e, ministériu públiku akuza arguidu kontra artigu 146 Kódigu Penál kona-ba ofensa ba integridade fízika grave konjuga ho artigu 35 alinea (a) Lei Kontra Violénsia Doméstika tanba prátika krime sira iha leten.

Iha prosesu julgamentu arguidu rekuza akuzasaun ministériu públiku no deklara katak nia la sona lezada ho tudik. Nia esklaresé katak iha momentu ne'ebá nia tuda duni blok maibé ho intensaun tuda mane ida ne'ebé bo'ok hela lezada maibé blok refere kona fali lezada. Entretantu, lezada mantein ho akuzasaun hosi ministériu públiku.

Iha alegasaun finál, ministériu públiku husu ba tribunál atu aplika pena prizaun tinan 5 ba arguidu bazeia ba deklarasaun hosi lezada katak arguidu komete duni krime ne'e hasoru nia no konfirma mós ho relatóriu médiku ne'ebé hatudu katak kazu ne'e akontese duni.

Entretantu, defeza husu ba tribunál atu konsidera sirkunstánsia atenuante ne'ebé asociadu ho krime ne'e hanesan arguidu foin primeira-ves komete krime no arguidu rekuza faktus balun. Tanba ne'e, defeza husu ba tribunál atu absolve arguidu maibé karik tribunál iha hanoin seluk, defeza husu atu aplika suspensaun ba pena prizaun ne'ebé favorese ba arguidu.

5. Kazu krime ofensa ba integridade fízika simples ho natureza violénsia doméstika - Nú. Prosesu : 474/13.TDDIL

Kompozisaun Tribunál	: Singulár
Juis	: Dra. Ana Paula Fonseca
Ministériu Públiku	: Dr. Matias Soares
Defeza	: Dra. Olga Barreto
Konkluzau	: Kondena ho pena prizaun tinan 1 suspende ba tinan 2

Iha 07 Novembru 2014, Tribunál Distritál Dili julga kazu krime ofensa ba integridade fízika simples ne'ebé komete hosi arguidu ME hasoru TAdC (lezada) nu'udar arguidu nia oan fetu. Kazu ne'e akontese iha 26 Juñu 2013, iha Distritu Ermera.

Ministériu Públiku akuza katak iha 26 Juñu 2013, tuku 07:00 dader, arguidu tebe be manas ne'ebé nono hela no be manas ne'e fakar iha lezada nia isin lolon no rezulta lezada hetan kanek iha hirus matan no ain. Motivú hosi akontesimentu tanba lezada lakohi atu kumu arguidu nia isin wainhira arguidu husu ajuda lezada atu kumu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 letra (b) Lei Kontra Violénsia Doméstika.

Iha audiensia julgamentu, arguidu konfesa, arrepende no deklara katak nia promete sei la repete tan ninia hahalok ne'e iha futuru tanba ne'e tribunál continua ba alegasaun finál.

Iha alegasaun finál, ministériu públiku husu ba tribunál atu aplika pena prizaun tinan 1 no suspende ba tinan 2. Entretantu, defeza konsidera katak arguidu konfesa faktus, arrepende no promete sei la repete ninia hahalok iha futuru, tanba ne'e husu ba tribunál atu aplika pena ne'ebé favorese ba arguidu.

Depois avalia faktus hotu, tribunál kondena arguidu ho pena tinan 1 suspende ba tinan 2. Sentensa ne'e bazeia ba arguidu nia deklarasaun katak nia komete duni krime ne'e hasoru lezada.

6. Kazu krime ofensa ba integridade física simples ho natureza violénsia doméstika - Nú. Prosesu : 579/13.TDDIL

Kompozisaun Tribunál	: Singulár
Juis	: Dra. Jumiati Maria Freitas
Ministériu Públiku	: Dr. Renato Bere Nahak
Defeza	: Dr. Cancio Xavier
Konkluzau	: Kondena ho penaa tinan 1 suspende ba tinan 1

Iha 10 Novembru 2014, Tribunál Distritál Dili prejide julgamentu ba kazu krime ofensa ba integridade física simples ne'ebé involve arguidu DdA hasoru LVS nu'udar arguidu nia feen. Kazu ne'e akontese iha 20 Setembru 2011, iha Distritu Dili.

Ministériu Públiku akuza katak iha 20 Setembru 2011, maizumenus iha tuku 21:00 kalan, arguidu basa dala tolu iha lezada nia hasan no tuku dala rua iha lezada nia ulun. Atus ne'e rezulta lezada sofre moras iha hasan no ulun. Kazu ne'e akontese tanba arguidu bolu lezada ne'ebé iha hela viziñu nia uma atu kous labarik maibé lezada la mai lalais.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 2, 3 no 35 alinea (b) Lei Kontra Violénsia Doméstika.

Iha prosesu julgamentu, arguidu rekoñese no konfesa katak akuzasaun hosi ministériu públiku loos. Arguidu deklara mós katak nia arrepende no promete sei la repete ninia tan ninia hahalok hanesan ne'e iha futuru. Aleinde ne'e, lezada mós reforsa liutan faktu hirak ne'e.

Tanba arguidu rekoñese ninia hahalok nune'e iha alegasaun finál, ministériu públiku husu ba tribunál atu aplika pena prizaun tinan 2.

Iha parte seluk, defeza husu ba tribunál atu aplika pena suspensa ba arguidu tanba hare ba sirkunstansia atenuante sira hanesan arguidu konfesa faktu sira, arrepende nia hahalok, promete

sei la repete tan ninia hahalok krime iha futuru. Aleinde ne'e arguidu mos iha oan ne'ebé sei ki'ik.

Iha 17 Novembru 2014, tribunál konklui prosesu kazu ne'e no kondena arguidu ho pena prizaun tinan 1 suspende ba tinan 1.

7. Kazu krime violasaun seksuál - Nú. Prosesu : 205/14.TDDIL

Kompozisaun Tribunál : Singulár
Juis : Dr. Jose Maria de Araújo (reprezenta juis koleтиву)
Ministériu Públiku : Dr. Reinato Bere Nahak
Defeza : Dra. Olga Barreto
Konkluzau : Absolve

Iha 10 Novembru 2014, Tribunál Distritál Dili prejide julgamentu ba kazu krime violasaun seksuál ne'ebé komete hosi arguidu AdC hasoru lezada AA. Kazu ne'e akontese iha 7 Maiu 2012, iha Becora, Distritu Dili.

Iha leitura akordaun ne'e, tribunál prova katak arguidu no lezada iha relasaun domin hanesan namorada tanba ne'e relasaun seksuál ne'ebé momentu ne'ebá akontese hanesan ho konsentimentu ka hakarak no hakarak. Bazeia provas ne'ebé produz durante prosesu julgamentu, tribunál absolve arguidu hosi akuzasaun ministériu públiku tanba la priense rekezitus hosi krime violasaun seksuál.

Antes ne'e ministériu públiku akuza katak iha loran akontesimentu, arguidu ba iha lezada nia uma tanba antes ne'e lezada kontaktu arguidu atu ba hasoru nia iha nia uma. Iha lezada nia uma ne'e, primeiru arguidu no lezada tur hamutuk iha varanda maibé la kleur lezada tama ba iha kuartu laran no arguidu mos tuir tama ba iha lezada nia kuartu laran. Iha kuartu laran, arguidu komete krime violasaun seksuál hasoru lezada.

Antes ne'e, iha prosesu julgamentu, lezada deklara katak nia hakarak halo relasaun seksuál ho arguidu tanba arguidu promete sei hola ka kaben ho nia. Maibé iha ikus, arguidu la responsabiliza ba nia hahalok.

Ministériu Públiku antes ne'e akuza arguidu tuir artigu 172 Kódigu Penál kona-ba violasaun seksuál.

Tanba hahalok arguidu la prenxe rekizitus violasaun seksuál, tribunál deside hodi absolve arguidu hosi akuzasaun ministériu públiku.

8. Kazu krime furtu agravadu - Nú. Prosesu : 642/14.TDDIL

Kompozisaun Tribunál : Koletivu
Juis : Dr. Antonia de Carmo, Dra. Jumiati M. Freitas no Dra. Fransisca Cabral
Ministériu Públiku : Dr. Reinato Bere Nahak
Defeza : Dr. Manuel Sarmento
Konkluzau : Sei kontinua prosesu

Iha 11 Novembru 2014, Tribunál Distritál Dili julga arguidu NdJ ne'ebé akuza komete krime furtu agravadu hasoru lezadu GSS. Kazu ne'e akontese iha 20 Dezembru 2013, iha Comoro, Distritu Dili.

Ministériu Públiku akuza katak iha 20 Dezembru 2013, maizumenus tuku 03:00 madrugada, arguidu liuhosi odamatan kotuk, arguidu tama ba iha lezadu nia uma naok telemovel 3, TV 1, Laptop 1, odamatan hosi ai teka 1 no viola 1. Sasan hirak ne'e ninia valor hamutuk US\$1,450,00.

Relasiona ho aktu ne'e, ministériu públiku akuza arguidu kontra artigu 252 alineaia (a) no (b) Kódigu Penál kona-ba furtu agravadu.

Iha prosesu julgamentu, arguidu konfesa no rekoñese ninia hahalok. Arguidu mós deklarara katak sasan hirak ne'ebé nia foti nia entrega fila fali ona ba iha nia nain.

Iha alegasaun finál, ministériu públiku husu ba tribunál atu kondena arguidu ho pena prizaun tinan 2 no suspende ba tinan 4.

Entretantu, defeza husu ba tribunál atu aplika suspensaun ba pena prizaun tanba arguidu arrepende, konfesa faktus sira iha akuzasaun no arguidu entrega fila ona sasan ne'ebé nia naok.

Depois rona tiha alegasaun, tribunál, marka fali prosesu julgamentu ho agenda desizaun finál ba iha 20 Novembru 2014, tuku 11:00 dader.

9. Kazu krime pekulatu de uzu - Nú. Prosesu : 768/14.TDDIL

Kompozisaun Tribunál : Koletivu
Juis : Dr. Jose Maria de Araujo, Dra. Fransisca Cabral no Dr. Antonio de Carmo
Ministériu Públiku : Dr. Jacinto Babo
Defeza : Dr. Arlindo Sanches (advogadu privadu)
Konkluzau : Sei kontinua prosesu

Iha 11 Novembru 2014, Tribunál Distritál Dili hala'o prosesu julgamentu ba kazu krime pekulatu de uzu ne'ebé involve arguidu NdS hasoru Estadu iha tinan 2008 no 2009. Julgamentu ne'e ho agenda rona deklarasaun hosi arguidu no testemuña sira.

Ministériu Públiku akuza katak iha tinan 2008 no 2009 arguidu asumi kargu nu'udar Embaxador ba Estados Unidos Amerikanu. Iha momentu asumi kargu ne'e arguidu suspeita uza osan

US\$35,500 hosi bens ba servisu embaxada nian hodi selu fali nia oan nia eskola. Aleinde ne'e osan seluk ho valor ne'ebé arguidu la temi, uza ba aluga apartamentu foun.

Tanba ne'e, ministériu públiku akuza arguidu kontra artigu 295 Kódigu Penál kona-ba pekulatu de uzu.

Iha prosesu julgamentu, arguidu deklar katak iha tempu ne'ebá nia hato'o pedidu verbal kona-ba kestaun atu muda apartamentu ne'e ba iha Ministru Estranjeiru, Jacarias Albano. Arguidu mós deklar katak nia entrega ona resivu aluga apartamentu ne'e ba iha seksaun finansas Ministeriu Estranjeiru nian. Aleinde ne'e, arguidu hatutan katak nia selu filafali ona osan ne'ebé nia foti hamutuk US\$59,600.00 ba seksaun finansa Ministériu Estranjeiru iha tinan 2013. Osan hirak ne'e aleinde osan ba selu eskola ba mós nesesidade seluk.

Testemuña CS nu'udar tékniku finansa iha Ministériu Estranjeiru depoimentu katak orsamentu ne'ebé aloka ba embaxada sira hanesan saláriu, vensimentu ba embaxada inklui saláriu ba staff, telefone no mina kareta. Tuir testemuña ne'e, wainhira nia hato'o relatóriu gastus orsamentu hosi embaxada Timor Leste nian Amerika, diretór finansa ministériu estranjeiru hato'o ba nia katak tenki hasai tiha item balun tanba gastus balun ne'ebé tuir lolos ba vensimentu embaxada, arguidu uza fali hodi aluga apartamentu no selu oan nia eskola.

Testemuña FA nu'udar Diretór Finansas ba Ministériu Negósiu Estranjeiru hosi tinan 2008 to'o 2009, depoimentu katak tempu ne'eba nia detekta duni arguidu uza orsamentu ne'ebé la'os partense arguidu nia osan privadu hodi selu ba oan nia eskola no balu selu ba apartamentu foun. Tanba iha erru ne'e, testemuña ba kedas iha Estadu Unidus Amerika hodi hatudu lista kona-ba gastus ne'ebé uza la tuir planu. Wainhira sasin konfirma ba arguidu, arguidu hatan katak diplomata mós persiza ezersisiu.

Depois rona tiha deklarasaun hosi arguidu no testemuña sira, tribunál marka fali prosesu julgamentu ba iha 03 Dezembru 2014, tuku 09:00 dader ho agenda rona depoimentu hosi eis ministru estranjeiru, Zacarias Albano.

10. Kazu krime ofensa ba integridade fízika grave - Nú. Prosesu : 963/14.TDDIL

Kompozisaun Tribunál : Koletivu
Juis : Dr. Antonino Gonçalves, Dra. Ana Paula Fonseca no Dra. Zulmira Auxiladora Barros
Ministériu Públiku : Dr. Matias Soares
Defeza : Dr. Jose da Silva
Konkluzau : Sei kontinua prosesu

Iha 13 Novembru 2014, Tribunál Distritál Dili julga kazu krime ofensa ba integridade fízika grave ne'ebé komete hosi arguidu CS hasoru GM. Kazu ne'e akontese iha 08 Marsu 2014, iha Letefoho, Distritu Ermera.

Ministériu públiku akuza katak iha 08 Marsu 2014, arguidu taa kanek lezadu nia liman los no rentos parte karuk nian. Lezadu konsege lori ba ospital hodi hala'o tratamentu ba nia liman no rentos ne'ebé kanek. Aktu ne'e rezulta lezadu nia liman los hetan aleza no seidak normal to'o agora. Kazu nee'e akontese tanba antes ne'e lezadu taa kotu arguidu nia kuda talin.

Ministériu Públiku akuza arguidu kontra artigu 146 Kódigu Penál kona-ba ofensa ba integridade fizika grave.

Iha prosesu julgamentu, arguidu konfesa no rekoñese katak nia komete duni krime ne'e hasoru lezada. Arguidu mós deklara katak nia arrepende ba ninia hahalok no promete sei la repete tan iha futuru. Aleinde ne'e, arguidu prontu atu taka lezadu nia kanek ho osan US\$1,000.00 no karau 1.

Entretantu, lezadu lakohi simu osan no karau ne'ebé arguidu promete atu fo ba nia tanba bele hamosu problema seluk iha futuru.

Iha alegasaun finál, ministériu públiku husu ba tribunál atu kondena arguidu ho pena prizaun tinan 4 fulan 6 tanba arguidu rasik konfesa faktus ne'ebe ministériu públiku imputa ba arguidu loos.

Entretantu, defeza husu ba tribunál atu aplika suspensaun ba pena prizaun ba arguidu tanba hare hosi sirkunstansia atenuante ne'ebé haleu iha kazu ne'e hanesan arguidu arrepende, konfesa faktus no prontu atu fo fali osan ba lezadu maske lezadu la simu.

Depois rona tiha alegasaun finál hosi parte sira, tribunál marka fali prosesu julgamentu ba iha 01 Dezembru 2014, tuku 11:00 dader ho ajenda leitura akordaun.

11. Kazu krime kondusaun sem karta - Nú. Prosesu : 1250/14.TDDIL

Kompozisaun Tribunál	: Singulár
Juis	: Dr. Antonio de Carmo
Ministériu Públiku	: Dra. Benvinda do Rosario
Defeza	: Dr. Jose da Silva
Konkluzau	: Kondena ho pena prizaun fulan 6 suspende ba tinan 1

Iha 13 Novembru 2014, Tribunál Distritál Dili hala'o julgamentu ba prosesu sumáriu ba kazu krime kondusaun sem karta ne'ebé involve arguidu AP iha 11 Novembru 2014, iha Pante Kelapa, besik Embaxada Amerika, Distritu Dili.

Ministériu Públiku akuza katak iha 11 Novembru 2014, polisia tranzitu kaptura arguidu iha Pantai Kelapa no detein iha sela polisia tanba kondus motor la ho karta kondusaun no laiha sapa matrikula.

Ministériu Públiku akuza arguidu kontra artigu 207 Kódigu Penál kona-ba kondusaun sem karta.

Iha prosesu julgamentu sumáriu ne'e, arguidu rekoñese ninia hahalok no deklarata katak nia, arrepende ona nia hahalok. Aleinde ne'e, arguidu promete sei trata nia karta kondusaun iha tempu badak.

Iha alegasaun finál, ministériu públiku husu ba tribunál atu aplika pena prizaun fulan 3 suspende ba tinan 1 atu halo prevensaun ida, nune'e la akontese tan iha futuru maske arguidu promete sei trata nia karta kondusaun.

Entretantu parte defeza, husu ba tribunál atu aplika suspensaun ba pena prizaun ne'ebé adekuaudu liu ba arguidu tanba arguidu foin primeira-ves komete krime, arrepende ba ninia hahalok no promete sei la repete tan iha futuru.

Bazeia alegasaun hosi alegasaun final hosi ministériu públiku no defeza, tribunál konklui prosesu kazu ne'e no kondena arguidu ho pena prizaun fulan 6 suspende ba tinan 1.

12. Kazu krime kondusan sem karta - Nú. Prosesu : 1251/14.TDDIL

Kompozisaun Tribunál	: Singulár
Juis	: Dr. Antonio do Carmo
Ministériu Públiku	: Dra. Benvinda do Rosario
Defeza	: Dr. Manuel Exposto
Konkluzau	: Kondena ho pena prizaun fulan 6 suspende ba tinan 1

Iha 13 Novembru 2014, Tribunál Distritál Dili hala'o prosesu sumáriu ba kazu krime kondusaun sem karta ne'ebé involve arguidu AdS, iha 11 Novembru 2014, iha Manleuana, Distritu Dili.

Ministériu Públiku akuza katak iha 11 Novembru 2014, polísia tranjitu kaptura arguidu iha parte Manleuana no detein arguidu iha sela polísia tanba kondus motor la uza kapasete no laiha karta kondusaun.

Ministériu Públiku akuza arguidu kontra artigu 207 Kódigu Penál kona-ba kondusaun sem karta.

Iha prosesu julgamentu ne'e, arguidu rekoñese faktu hirak ne'e no deklarata katak nia arrepende nia hahalok. Aleinde ne'e, arguidu promete sei trata nia karta kondusaun iha tempu badak.

Maske arguidu arrepende no promete sei trata nia karta kondusaun maibé iha alegasaun finál, ministériu públiku kontinua husu ba tribunál atu kondena arguidu ho pena prizaun maibé suspende ba tinan 1 atu eduka arguidu la repete ninia hahalok iha futuru no pena ne'e hanesan prevensaun jeral ida ba sidadaun sira seluk.

Entretantu, defeza husu ba tribunál atu aplika suspensaun ba pena prizaun ne'ebé adekuaudu. Defeza husu pena refere tanba tetu ba sirkunstansia atenuante hanesan arguidu foin primeira-ves komete krime, konfesa ba faktus, arrepende ba ninia hahalok no promete sei la repete iha futuru.

Depois avalia faktus hotu, tribunál konklui prosesu ne'e no kondena arguidu ho pena prizaun fulan 6 suspende ba tinan 1.

13. Kazu krime kondusaun sem karta - Nú. Prosesu : 1252/14.TDDIL

Kompozisaun Tribunál : Singulár
Juis : Dr. Antonio do Carmo
Ministériu Públiku : Dra. Benvinda do Rosario
Defeza : Dr. Manuel Exposto
Konkluzau : Kondena ho pena prizaun fulan 6 suspende ba tinan 1

Iha 13 Novembru 2014, Tribunál Distritál Dili hala'o prosesu sumáriu ba kazu krime kondusaun sem karta ne'ebé involve arguidu AS iha 11 Novembru 2014, iha Manleuana, Distritu Dili.

Ministériu Públiku akuza katak iha 11 Novembru 2014, polisia unidade tranjitu kaptura arguidu no hatama ba iha sela polisia tanba arguidu kondus motor la ho karta kondusaun.

Ministériu Públiku akuza arguidu kontra artigu 207 Kódigu Penál kona-ba kondusaun sem karta kondusaun.

Iha prosesu julgamentu ne'e, arguidu rekoñese faktu hirak ne'e no deklarata katak nia arrepende ona nia hahalok. Aleinde ne'e, arguidu promete sei trata nia karta kondusaun iha tempu badak.

Iha alegasaun finál, ministériu públiku husu ba tribunál atu kondena arguidu ho pena prizaun maibé suspende ba tinan 1 atu eduka arguidu atu la repete ninia hahalok iha futuru no inklui halo prevensaun jeral ida ba sidadaun sira seluk.

Entretantu defeza husu ba tribunál atu aplika suspensaun ba pena prizaun ne'ebé adekuadu. Defeza husu pena refere tanba tetu ba sirkunstansia atenuante hanesan arguidu foin primeira-ves komete krime, konfesa ba faktus, arrepende ba ninia hahalok no promete sei la repete iha futuru.

Depois avalia faktu sira, tribunál konklui prosesu kazu ne'e no kondena arguidu ho pena prizaun fulan 6 suspende ba tinan 1.

14. Kazu krime omisídiu negligente - Nú. Prosesu : 634/14.TDDIL

Kompozisaun Tribunál : Singulár
Juis : Dra. Fransisca Cabral
Ministériu Públiku : Dr. Vicente Brito
Defeza : Dr. Manuel Exposto
Konkluzau : Sei kontinua prosesu

Iha 14 Novembru 2014, Tribunál Distritál Dili hala'o prosesu julgamentu ba kazu krime omisídiu negligente ne'ebé involve arguidu SH hasoru lezadu Afonso Expirito Santo (matebian). Kazu ne'e akontese iha 01 Feveireiru 2014, iha Bebora, Distritu Dili.

Ministériu Públiku akuza katak, iha 01 Feveireiru 2014, tuku tuku 20:00 kalan, arguidu kondus kareta ho velocidade makas no soke lezadu ne'ebé iha momentu ne'ebá hakat hela ba estrada sorin no rezulta lezadu kanek todan. Lezadu konsege lori ba hala'o tratamentu iha Hospitál Nasional Guido Valadares maibé liutiha loron 10 lezadu hakotu nia is tanba rezulta hosi asidente soke ne'e.

Ministériu Públiku akuza arguidu kontra artigu 140 alinea (2) Kódigu Penál kona-ba omisídiu negligente.

Iha prosesu julgamentu arguidu konfesa katak akuzasaun hosi ministériu públiku loos. Arguidu mós deklara katak wainhira lezadu hala'o hela tratamentu iha ospitál, nia ba vizita dala rua no iha momentu lezada hakotu nia iis. Arguidu ajuda família matebian ho osan US\$5,000 hodi ajuda iha seremónia funeral.

Testemuña SNM hanesan família matebian (tinan 42) depoimenta katak maske família matebian hetan ona osan US\$5,000 hosi arguidu maibé husu ba tribunál oinsa ho futuro labarik na'in 5 ne'ebé sei ki'ik ne'ebé presiza ajuda hosi kompania Lelolai ne'ebé arguidu servisu ba.

Iha alegasaun finál, ministériu públiku husu ba tribunál atu aplika pena prizaun tinan 1 suspende ba tinan 2, tanba arguidu rasik konfesa katak akuzasaun los no kona-ba responsabilidade ba labarik sira, ministériu públiku husu ba família matebian hatama prosesu ne'e liuhosi prosesu sivil.

Entretantu, defeza husu ba tribunál atu aplika pena ne'ebé justu tanba arguidu foin primeira-ves komete krime, arrepende no konfesa ba ninia hahalok. Aleinde ne'e arguidu mós ajuda ona família matebian ho osan US\$5,000.

Depois rona tiha alegasaun finál, tribunál marka fali prosesu julgamentu ba iha 22 Novembru 2014, tuku 15:00 lorokraik ho ajenda leitura sentensa.

15. Kazu krime danu agravadu - Nú. Prosesu : 314 /14.TDDIL

Kompozisaun Tribunál	: Koletivu
Juis	: Dr. Antonino Gonsalves, Dra. Ana P. Fonseca no Dra. Zulmira
Auxiliadora Barros	
Ministériu Públiku	: Dr. Matias Soares
Defeza	: Dr. Jose da Silva
Konkluzau	: Sei kontinua prosesu

Iha 17 Novembru 2014, Tribunál Distritál Dili julga arguida SdO ne'ebé akuza komete krime danu agravadu hasoru nia eis kaben (NGP). Kazu ne'e akontese iha 20 Feveireiru 2014, iha Kintal Boot, Distritu Dili.

Ministériu Públiku akuza katak iha 20 Feveireiru 2014, tuku 12:00 meudia, arguida tuda rahun lezadu nia kareta vidru oin, sorin no kotuk. Aktu ne'e hamosu prejuízu ba lezadu hamutuk US\$ 1,200. Kazu ne'e akontese tanba lezadu atu foti fali kareta ida ne'ebé arguida uza loron-loron hodi ba servisu no tula oan ba mai eskola.

Ministériu Públiku akuza arguida kontra artigu 259 Kódigu Penál kona-ba danu agravadu.

Iha prosesu julgamentu arguida rekoñese no konfesa ninia hahalok. Maibé arguida justifika katak nia tuda lezadu nia kareta ne'e tanba lezadu atu hadau fali kareta seluk ne'ebé nia uja hodi hala'o servisu no tula labaraik sira ba mai eskola. Arguida deklarara mós katak lezadu la tau matan ba labarik sira nia moris.

Entretantu, lezadu konfirma katak to'o agora vidru kareta refere seidak troka no tenki hameno hosi Indonezia ho folin US\$1,200.

Depois rona tiha deklarasaun hosi arguida no lezadu, tribunál marka fali prosesu julgamentu ba iha 01 Dezembru 2014, tuku 09:00 dader ho ajenda rona depoimentus hosi testemuña.

16. Kazu krime ofensa ba integridade física simples ho natureza violência doméstica - Nú. Prosesu : 354/14.TDDIL

Kompozisaun Tribunál : Singulár
Juis : Dr. Jose Maria de Araújo
Ministériu Públiku : Dra. Ivonia Guterres
Defeza : Dra. Olga Barreto
Konkluzau : Kondena ho pena prizaun tinan 1 suspende ba tinan 1 fulan 6

Iha 17 Novembru 2014, Tribunál Distritál Dili prezide julgamentu leitura sentensa ba kazu krime ofensa ba integridade física simples ho natureza violência doméstica ne'ebé arguidu FP hasoru nia feen. Kazu ne'e akontese iha 10 Setembru 2012, Distritu Dili.

Tribunál prova katak arguidu tuku dala ida iha lezada nia ulun no tebe dala ida iha kotuk laran, no lori tudik ida hakanek lezada nia kabas.

Bazeia ba provas refere, tribunál kondena arguidu ho pena prizaun tinan 1 suspende ba tinan 1 fulan 6. Tribunál konklui desizaun ne'e bazeia ba deklarasaun hosi arguidu ne'ebé deklarara katak nia komete duni krime refere hasoru lezada no konfirmasaun hosi lezada.

17. Kazu krime ofensa ba integridade física simples - Nú. Prosesu : 715/14.TDDIL

Kompozisaun Tribunál : Singulár
Juis : Dr. Jose Maria de Araujo
Ministériu Públiku : Dra. Ivonia Guterres
Defeza : Dra. Olga Barreto
Konkluzau : Sei kontinua prosesu

Iha 18 Novembru 2014, Tribunál Distritál Dili, julga arguida AdC ne'ebé akuzada komete krime ofensa ba integridade fizika simples hasoru lezada EdM. Kazu ne'e akontese iha Distritu Ermera.

Ministériu Públiku akuza katak arguida tuda lezada nia ren-toos no rezulta kanek iha ren-toos. Motivu hosi akontesimentu ne'e tanba sira diskuti malu relasiona ho sira nia laen ladun tau matan ba iha arguida hanesan feen boot. Arguida no lezada hanesan feen primeiru no segundu.

Ministériu Públiku akuza arguidu kontra artigu 145 Kódigu Penál kona-bá ofensa ba integridade fizika simples.

Iha prosesu julgamentu, arguida rekoñese no konfesa katak nia tuda duni lezada ho fatuk maibé fatuk ne'e ladun boot.

Iha parte seluk, lezada kontinua konfirma faktu sira iha akuzasaun ministériu públiku no to'o agora nia no arguida seidak dame malu.

Testemuña FM (tinan 43) nu'udar viziñu depoimentu katak nia la hare ho matan akontesimentu tuda malu entra arguida no lezada, maibé nia so hare deit wainhira lezada hetan ona kanek no duni arguida ho katana. Testemuña hatutan katak lezada duni maibé la toman, tanba ne'e lezada ba lere fali arguida nia batar iha tos laran.

Iha alegasaun finál, ministériu públiku husu ba tribunál atu aplika pena prizaun tinan 1 suspende ba tinan 1 fulan 6 tanba arguida konfesa ninia hahalok nomós konfirmasaun hosi lezada.

Entretantu, defeza husu ba tribunál atu aplika pena ne'ebé adekua ba arguida tanba arguida foin primeira-ves komete krime, konfesa no arrepende ba ninia hahalok.

Depoide rona tiha alegasaun hosi parte sira, tribunál marka fali julgamentu ba iha 01 Dezembru 2014, tuku 11:00 lorokraik ho ajenda leitura sentensa.

18. Kazu krime ameasa - Nú. Prosesu : 839/14.TDDIL

Iha Kompozisaun Tribunál : Singulár
Juis : Dr. Jose Maria de Araujo
Ministériu Públiku : Dra. Benvinda do Rosario
Defeza : Dra. Marcelino Marques
Konkluzau : Sei kontinua prosesu

Iha 19 Novembru 2014, Tribunál Distritál Dili julga arguida MdC no arguidu BdC ne'ebé akuzadu komete krime ameasa hasoru lezada JG nu'udar arguidu BdC nia eis feen no arguida MdC nia fetu foun. Kazu ne'e akontese iha 26 Abril 2014, iha Mascarenhas, Distritu Dili.

Ministériu Públiku akuza katak iha 26 Abril 2014, arguidu BdC no arguida MdC duni sai lezada hosi uma ne'ebé lezada hela ba. Arguidu sira ninia hahalok halo lezada senti ameadu. Kazu ne'e akontese tanba lezada kesar arguidu ba iha ministériu públiku kona-ba arguidu la fo alimentasaun ba labarik.

Relasiona ho krime ne'e, ministériu públiku akuza arguidu kontra artigu 157 Kódigu Penál kona-ba krime ameasa.

Arguidu no arguida deklara katak sira la ameasa lezada maibé fo hatene deit ba lezada atu nia sai ona hosi uma refere tanba sira soe malu ona. Sira hatutan katak antes prosesu julgamentu kona-ba alimentasaun, lezada rasik promete katak nia sei sai hosi uma depois desizaun tribunál nian maibé depois desizaun sai lezada lakohi sai hosi uma. Tanba ne'e mak sira husu atu lezada sai hosi uma la'os ameasa lezada.

Entretantu, lezada deklara katak nia senti ameadu tanba sira duni sai nia hosi uma refere maske osan alimentasaun ba labarik ne'ebé arguidu promete iha tribunál arguidu la kumpri. Aleinde ne'e, lezada no nia oan sira laiha uma seluk atu hela.

Iha alegasaun finál, ministériu públiku husu ba tribunál atu aplika pena prizaun tinan 1 suspende ba tinan 3 tanba arguidu no arguida provadu fo presaun ba lezada liuhosi liafuan sira ne'ebé sira hasai hasoru lezada. Aleinde ne'e lezada laiha hela fatin seluk atu nia no oan sira ba hela. Arguidu mós inkomprimentu ba alimentasaun ne'ebé tribunál desidi ona antes.

Defeza argumentu katak arguidu sira la ameasa maibé informa deit ba lezada atu sai hosi uma refere tanba antes ne'e lezada rasik mak promete liafuan katak depois desizaun hosi tribunál ba kazu alimentasaun ba labarik nia sei sai. Tanba ne'e, husu ba tribunál atu aplika pena ne'ebé justu ba arguidu no arguida.

Depoisde rona tiha alegasaun hosi parte sira, tribunál marka fali julgamentu ba iha 02 Dezembru 2014, tuku 15:00 lorokraik ho ajenda leitura sentensa.

19. Kazu krime omisídiu agravadu - Nú. Prosesu : 1101/2014.TDDIL

Kompozisaun Tribunál : Koletivu
Juis : Dra. Jacinta Correia, Dra. Jumiati Freitas no Dra. Francisca Cabral
Ministériu Públiku : Dr. Vicente Brites
Defeza : Dr. Pedro Aparicio
Konkluzau : Sei kontinua prosesu

Iha 24 Novembru 2014, Tribunál Distritál Dili prezide julgamentu ba kazu krime omisídiu agravadu ne'ebé involve arguidu nain 10 (NdCO, AdS, JdS, BdS, FF, GSdS, JG, FdCO, NdC no

RdC). Arguidu sira deskonfia lezad oho-mate lezadu FdS (matebian), iha 29 Jullu 2014, iha Suku Sibuli, Sub-Distritu Metinaro, Distritu Dili.

Ministériu Públiku akuza katak iha 29 Jullu 2014, arguidu sira tau forsa hamutuk hamate lezadu FdS, iha arguidu sira nia hela fatin, suku Sibuli. Arguidu sira sona lezadu ho dima no baku fila-fila lezadu nia isin lolon no ho sasan kroat sira hanesan katana, besikanu nomós ai-maran. Kazu ne'e akontese bainhira lezadu ho nia grupu ne'ebé partensia hosi Suku Duyung ba asaltu komunidadu sira iha Suku Sibuli ne'ebé arguidu sira hela ba.

Tanbá ne'e, ministériu públiku akuza arguidu sira kontra artigu 139 Kódigu Penál kona-ba omisídiu agravadu letra (a) kona-ba torturasau.

Julgamentu ne'e hahú ho rona deklarasaun hosi arguidu AdS ne'ebé konfirma ho akuzasaun hosi ministériu públiku katak arguidu uza duni ai-tasi maran ida baku dala ida (1) iha lezadu nia ulun fatuk parte kanuruk bainhira arguidu na'in rua seluk, JG no FdCO toman lezadu no lori tun hosi foho loloon ho intensaun atu lori ba iha eskuadra polisia komunitáriu, Suku Sibuli. Maske nune'e, arguidu konfesa katak nia laiha koñesimentu ba motivu hosi asaltu inklui la koñese lezadu.

Iha 25 Novembru 2014, Tribunál Distrital Dili kontinua hala'o julgamentu hodi rona deklarasaun hosi arguidu JdS ne'ebé konfirma faktu sira hosi akuzasaun katak arguidu uza besikanu baku dala ida ba lezadu nia kotuk laran no rezulta lezadu monu ba rai. Arguidu deklarasaun katak nia baku lezadu tanba hirus lezadu ba ataka iha sira nia fatin.

Nune'e mós, arguidu NdCO, ne'ebé konfirma ho akuzasaun hosi ministériu públiku katak arguidu uza dima sona dala ida ba iha lezadu nia kotuk laran no iha parte knosan liman loos, wainhira toman lezadu monu latan iha rai. Maibé, arguidu deklarasaun katak antes ne'e lezadu ho kondisaun iis laiha ona no ran sai hosi inus, ulun fatuk no ibun.

Arguidu nia deklarasaun kontrariu malu ho arguidu AdS no JdS katak lezadu sei moris hela, bainhira sira husik arguidu.

Parte seluk, arguidu BdS rejete akuzasaun ministériu públiku ne'ebé haktuir katak nia uza rama ambon nia lolon baku dala ida ba lezadu nia kotuk laran. Arguidu ne'e deklarasaun katak nia basa duni dala ida iha lezadu nia hasan, bainhira toman lezadu no arguidu na'in rua, JG no FdCO la'o tuun hosi rai-lolon.

Tuir-mai arguidu FF konfirma ho akuzasaun hosi ministériu públiku katak arguidu uza katana nia belar baku dala ida ba lezadu nia kotuk laran wainhira toman lezadu tuun hosi foho-lolon. Maske nune'e, hafoin baku tiha lezadu, arguidu fila kedan ba uma no lahatene se mak oho lezadu.

Nune'e mós arguidu GSdS, NdC no RdC rejete akuzasaun ministériu públiku katak arguidu baku lesuk matebian nia isin lolon, wainhira toman lezadu tuun hosi rai lolon.

Arguidu sira deklarata katak iha loron akontesimentu arguidu sira laiha fatin akontesimentu. Maske nune'e, arguidu RdC konfesa ba tribunál katak, antes ne'e iha duni problema baku malu entre arguidu ho lezadu nia alin-mane naran Sico.

Aleinde ne'e, arguidu JG no FdCO mós rejenta akuzasaun ministériu públiku ne'ebé haktuir katak sira nain rua mak kaer metin lezadu hodi arguidu sira seluk halo torturasaun hasoru lezadu to'o mate fatin. Arguidu nain rua ne'e deklarata katak, iha momentu ne'ebá lezadu bolu sira nain rua hodi intrega nia an no lezadu mós husu ba sira atu lori nia ba polisia tanba lezadu ho kondisaun lanu no laiha ona forsa atu halai.

Kazu ne'e hahu fali iha 26 Novembru 2014, tribunál hala'o prosesu julgamentu hodi rona depoimentu hosi testemuña sira.

Testemuña FdCO nu'udar polisia komunitáriu iha Suku Sibuli, depoimenta katak nia iha duni koñesimentu relasiona ho asaltu ne'ebé lezadu ho nia grupu halo ba Suku Sibuli, maibé, testemuña la haree direta se mak oho lezadu tanba wainhira testemuña to'o iha fatin akontesimentu, lezadu mate tiha ona.

Testemuña FdSB alias Sico, nu'udar lezadu nia alin rekoñese katak antes ne'e entre nia no arguidu RdC iha problema baku malu. Iha 27 Jullu 2014, testemuña informa ba lezadu kona-ba asaltu hosi arguidu RdC ne'ebé rezulta testemuña matan fukun nakles.

Maske nune'e, testemuña depoimenta katak laiha koñesimentu ba asaltu hosi lezadu ho nia grupu, tanbá testemuña iha momentu ne'ebá sofre hela matan moras nune'e la bele loke matan tanba ne'e iha momentu ne'ebá toba hela iha uma.

Entertantu, testemuña GS no LB hosi Suku Duyung depoimenta katak nia laiha koñesimentu ba asaltu ne'e inklui la koñese lezadu ho nia família.

Iha 26 Novembru 2014, Tribunál Distritál Dili kontinua hala'o prosesu julgamentu hodi rona alegasaun finál hosi ministériu públiku.

Iha alegasaun finál, ministériu públiku husu ba tribunál atu halo kualifikasaun jurídika hosi krime omisídiu agravadu ba fali krime omisídiu simples. Ministériu Públiku husu ba tribunál atu kondena arguidu NdCO, AdS no JdS bazeia ba krime omisídiu simples nia moldura penál.

Ba arguidu FF no BdS, ministériu públiku husu ba tribunál kondena bazeia ba krime ofensa integridade fízika simples no husu absolve ba arguidu nain 5 ; GSdS , JG, FdCO, NdC no RdC.

Ministériu Públiku konsidera kazu ne'e akontese ho motivu odio malu ba problema baku malu antes entre arguidu ho inisial RdC ho lezadu nia alin FdSB alias "Sico".

Entertantu, parte defeza apresia ho ministériu públiku nia alegasaun finál no husu ba tribunál atu hamonu pena ne'ebé justu, tanbá provas barak hatudu arguidu sira laiha intensaun atu hamate

lezadu. Defeza mós husu ba tribunál atu konsidera kolaborasaun hosi arguidu sira tanba konfesa tomak sira nia hahalok, maske laiha testémuña mak haree direta arguidu sira wainhira oho lezadu.

Hafoin rona parte sira hotu, tribunál deside marka fali ajenda ba 15 Dezembru 2014, tuku 15:00 lorokraik hodi rona leitura ba akordaun.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Telefone:3323883 | 77295795